



## STINAPA TA INFORMA

### FLAMINGU DI PALU

E 'much'é Tera Kòrá' ku 3 yu di kriansa, ya tin 53 aña, pero no ta mustra! Ku 9 aña ya kaba e tabata musikante (kitara, drùms, òrgel, bas). Su ofishi ta karpinté pero e ta traha tambe obranan di arte di kueru, oro, plata i palu masha bunita pa turistanan. Tur 'happy hour' bo ta hañ'é na un hotèl lokal ta deleitá bishitantenan den su banda 'The Flamingo Rockers'. Gilbert 'Gibi' Bomba sa bon kon biba di nos naturalesa na un manera respetá. Puntrand'é kiku ta hasi'é orguyoso di nos naturalesa, Gibi normalmente hopi humilde, ta bria. E ta asina kontentu ku e naturalesa boneriano ta asina konservá, limpi, sin polushon i bunita. P'e, esaki ta algu di admirá. I tambe e echo ku nos ta kumpli ku mayoria regla internashonal tokante kuido di naturalesa. Gibi ta sinti'é bon tur kaminda den naturalesa boneriano. Pero na Boka Kokolishi e ta sinti'é den otro mundu. Asina relahá e ta sinti su mes na e sitio aki. E ta splika kon naturalesa a trah'é den un manera speshal: e ta den forma di un 'zwembad' natural. Gibi ta atvertí si pa tene kuido ku e parti patras ya ku tin un buraku den e awa ku por 'zuig' bo ora ku ola bini. Segun Gibi nos mester di naturalesa, por ehèmpel e palunan, pa nos rosea. Mientras ku e turista ta bini netamente pa e naturalesa ya ku esei ta loke ta interesá e turista masha hopi mes. Esei ta loke Boneiru ta konosí p'e mundialmente. Gibi ta sigui kontá ku ántes nos a malusá diferente kos den naturalesa, manera kohe hopi turtuga, karkó, èts. Pesei mes awó mester kuid'é. E ta fuertemente kontra di tiramentu di shushi unda ku ta. Pal'i Wayaká ta un di su palunan faboritu pa traha obra di man kun'é. Pero e ta masha kla aki: e no ta destruí e palu pero simplemente 'snoei' e. Pues traha ku e takinan so. Asina yen di obra a mira lus di dia manera: flamingu, karkó i turtuga di palu. I ku nos kueru di kabritu netamente boneriano e ta krea obranan manera tas, pòtmòni i kos pa kologá na muraya. "Mi ta respetá naturalesa, nos mester di djé, nos ta dependé di djé." *Skirbí pa Natalie Wanga, tradusi pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALES



**Traha huntu na un desaroyo duradero pa Boneiru**